

Četvrtak, 15. decembra 2011. godine Broj 9

Na osnovu člana V 3. d) Ustava Bosne i Hercegovine i saglasnosti Parlamentarne skupštine Bosne i Hercegovine (Odluka broj 01,02-02-10-1349/10 od 14. septembra 2011. godine), Predsjedništvo Bosne i Hercegovine na 12. redovnoj sjednici, održanoj 15. septembra 2011. godine, donijelo je

ODLUKU

O RATIFIKACIJI SPORAZUMA IZMEĐU VIJEĆA MINISTARA BOSNE I HERCEGOVINE I VLADE CRNE GORE O GRANIČNIM PRIJELAZIMA ZA MEĐUNARODNI SAOBRAĆAJ

Član 1.

Ratifikuje se Sporazum između Vijeća ministara Bosne i Hercegovine i Vlade Crne Gore o graničnim prijelazima za međunarodni saobraćaj, potpisan u Podgorici, 7. oktobra 2010. godine na bosanskom, hrvatskom, srpskom i crnogorskom jeziku.

Član 2.

Tekst Sporazuma glasi:

SPORAZUM

IZMEĐU VIJEĆA MINISTARA BOSNE I HERCEGOVINE I VLADE CRNE GORE O GRANIČNIM PRIJELAZIMA ZA MEĐUNARODNI PROMET

Vijeće ministara Bosne i Hercegovine i Vlada Crne Gore (u daljem tekstu: strane potpisnice),

U želji da unaprijede promet roba i kretanje građana između dvije države i olakšaju međunarodni promet preko zajedničke državne granice, Sporazumjele su se o slijedećem:

Član 1.

(Granični prijelazi)

(1) Strane potpisnice određuju granične prijelaze za međunarodni promet na zajedničkoj državnoj granici, njihovu kategorizaciju, inspeksijske službe, radno vrijeme i granične prijelaze preko kojih se obavlja promet putnika i robe.

(2) Granični prijelazi za međunarodni cestovni, robni i putnički promet:

- a) Metaljka – Metaljka (na putnom pravcu Čajniče – Pljevlja)
- b) Hum - Šćepan polje (na putnom pravcu Foča – Plužine)
- c) Deleuša - Vraćenovići (na putnom pravcu Bileća – Nikšić)
- d) Klobuk - Ilino Brdo (na putnom pravcu Trebinje – Nikšić)
- e) Zupci - Sitnica (na putnom pravcu Trebinje – Herceg Novi)

(3) Granični prijelazi za međunarodni cestovni, robni i putnički promet su otvoreni 24 sata dnevno za promet roba i putnika.

(4) Granični prijelazi za međunarodni cestovni promet pod tač. b) i d) su granični prijelazi prve (1) kategorije i na istim se izvoze, uvoze i prevoze sve vrste roba, uključujući i robe koje podliježu plaćanju akcize, veterinarskom i fitosanitarnom pregledu prema propisima strana potpisnica.

(5) Na graničnom prijelazu Hum - Šćepan polje uspostavlja se fitosanitarna kontrola nakon rekonstrukcije graničnog prijelaza.

(6) Granični prijelazi za međunarodni cestovni promet pod tač. a), c) i e) su granični prijelazi druge kategorije (2) i na istom se izvoze, uvoze i prevoze sve vrste roba, osim robe na koju se plaća akciza. Na graničnom prijelazu pod tač. c) i e) ne može se obavljati izvoz, uvoz i prijevoz robe koja podliježe inspekcijskom nadzoru.

(7) Na graničnom prijelazu Metaljka – Metaljka uspostavlja se fitosanitarna kontrola na period od godine dana od dana potpisivanja ovog sporazuma (utorkom i četvrtkom po najavi).

(8) Radno vrijeme inspekcijskih službi utvrdiće nadležni organi strana potpisnica o čemu će druga strana potpisnica biti obavještena.

(9) Na graničnom prijelazu Sitnica – Zupci uspostavlja se robni promet nakon rekonstrukcije graničnog prijelaza, suglasno dogovoru strana potpisnica.

(10) Granični prijelaz za međunarodni putnički promet:

a) Vitina– Šula (na putnom pravcu Foča – Pljevlja).

(11) Radno vrijeme graničnog prijelaza za međunarodni putnički promet je 24 sata.

Član 2.

(Promet preko državne granice)

(1) Promet preko državne granice između Bosne i Hercegovine i Crne Gore, dozvoljen je samo na mjestima određenim sporazumima, kao graničnim prijelazima za međunarodni i pogranični promet.

(2) Promet ljudi i roba, van graničnih prijelaza određenih sporazumima iz stava 1. ovog člana, nije dozvoljen.

(3) Strane potpisnice će adekvatnim sredstvima i odgovarajućom kontrolom zatvoriti sve lokacije koje sporazumima nisu određene kao granični prijelazi, o čemu će, blagovremeno, obavijestiti svoje građane.

Član 3.

(Nadzor)

(1) Nadzor nad provođenjem odredbi ovog sporazuma obavlja Mješovita komisija za granične prijelaze koju čine predstavnici strana potpisnica (u daljem tekstu: Mješovita komisija).

(2) Svaka strana potpisnica imenuje predsjednika svog dijela Komisije i po pet članova.

(3) Komisija će se obrazovati u roku od 60 dana od dana potpisivanja ovog Sporazuma.

(4) O imenovanju i izmjenama predsjednika Komisije, dvije strane će se međusobno obavještavati diplomatskim putem, a o izmjenama članova Komisije predsjednici Komisija će se obavještavati razmjenom pisama.

(5) Komisija u svom radu može angažirati i stručnjake iz drugih oblasti.

Član 4.

(Zadaci i način rada Mješovite komisije)

(1) Osnovni zadaci Mješovite komisije su:

a) da prati i analizira primjenu Sporazuma,

b) da razmatra i rješava sva pitanja koja će se javljati tokom primjene Sporazuma,

c) da nadležnim organima strana potpisnica daje prijedloge za izmjene i dopune Sporazuma i predlaže poduzimanje mjera koje se odnose na poboljšanje uvjeta za njegovu primjenu.

(2) Način rada Mješovite komisije utvrđuje se Poslovníkom.

(3) Mješovita komisija će se sastajati i raditi prema ukazanoj potrebi, a najmanje jednom kvartalno, naizmjenično na teritoriji jedne i druge strane potpisnice.

Član 5.

(Imunitet, oslobađanje od taksi i pružanje pomoći)

(1) Članovi Mješovite komisije, eksperti i pomoćno osoblje, za vrijeme boravka na teritoriji druge strane potpisnice, radi obavljanja zadataka iz svoje nadležnosti, uživaju osobni imunitet i nepovredivost službenih dokumenata.

(2) Stvari i prijevozna sredstva potrebna za rad Mješovite komisije, oslobođeni su plaćanja takse, uvozne i izvozne carine.

(3) Organi svake strane potpisnice pružiti će osobama iz stava 1. ovog člana potrebnu pomoć u osiguranju smještaja, prijevoznih sredstava i uspostavljanju veze sa vlastitim vlastima.

Član 6.

(Vrijeme trajanja i otkazni rok)

(1) Sporazum se sklapa na neodređeno vrijeme.

(2) Svaka strana potpisnica može Sporazum otkazati diplomatskim putem, s otkaznim rokom od šest mjeseci.

Član 7.

(Potvrđivanja i stupanje na snagu)

Ovaj sporazum podliježe potvrđivanju u skladu sa zakonodavstvom strana potpisnica, a stupa na snagu osmog dana od dana prijema posljednjeg obavještenja diplomatskim putem, kojim se strane potpisnice uzajamno obavještavaju o ispunjenju uvjeta predviđenih unutarnjim zakonodavstvom strana potpisnica za stupanje na snagu sporazuma.

Sačinjeno u Podgorici, dana 07.10.2010. godine, u dva originalna primjerka, na službenim jezicima Bosne i Hercegovine (bosanski, hrvatski i srpski) i na crnogorskom jeziku, pri čemu su svi tekstovi jednako vjerodostojni.

Za Vijeće ministara
Bosne i Hercegovine
Sadik Ahmetović, s. r.

Za Vladu
Crne Gore
Ivan Brajović, s. r.

Član 3.

Ova odluka će biti objavljena u "Službenom glasniku BiH" na bosanskom, hrvatskom i srpskom jeziku i stupa na snagu danom objavljivanja.

Broj 01-50-1-2841-46/11
15. septembra 2011. godine
Sarajevo

Predsjedavajući
Željko Komšić, s. r.